

郑伯克段于鄢 隐公元年

谷梁传

克者何、能也。何能也、能杀也。一字诛心。何以不言杀、见段之有徒众也。

段有徒众、不易杀也。不易杀而卒杀之、故曰能杀。

段、郑伯弟也。何以知其为弟也、杀世子母弟目君、母弟、同母弟也。目君、

谓称郑伯。

以其目君、知其为弟也。段、弟也而弗谓弟、公子也而弗谓公子、

贬之也。段失子弟之道矣。所以贱段而甚郑伯也。贱段、谓不称公子及弟。甚郑伯、谓目君也。○一语绌前后、有力。何甚

乎郑伯、甚郑伯之处心积虑、成于杀也。段恃宠骄恣、强足当国、郑伯不能防闲以礼、教训以道、纵成其恶、终致大辟。处心积虑、志欲杀弟。○一句断尽。

于鄢、远也、犹曰取之其母之怀中而杀之云尔、甚之也。郑伯之杀段、盖追恨姜氏爱段恶己也。读之使人堕泪。然

则为郑伯者宜奈何。缓追逸贼、亲亲之道也。设处得甚妙。

郑伯以恶养天伦、使陷于罪、因以剪之。春秋推见至隐、首诛其意、以正人心。谷梁只处心积虑四字、已发透经义、核于他传。